

SUPREMUM SIGNATURAE APOSTOLICAE TRIBUNAL

Prot. n. 41767/08 CG

N

Iurium

Recursus adversus decretum rotale diei 19 iulii 2008

(Pontificia Universitas X – Capitulum Y – Archiconfraternitas Z)

DECRETUM

Vi decisionum rotalium dierum 24 iulii 2003, 17 ianuarii 2008 et 19 iulii 2008 atque sententiae, ab H.S.T. die 5 septembris 2009 latae, in rem iudicatam transit, inter alia, Archiconfraternitati Z usum locorum sub num. [5], [6], [7], [8] et [9], de quibus in adiecta descriptione, non competere.

Clausula exsecutionis praedita, sententia H.S.T. ad exsecutionem quod attinet Em.mo Ordinario litteris diei 6 octobris 2009 transmissa est, qui tamen, ob quasdam animadversiones a Cl.mo Archiconfraternitatis Patrono motas, hoc Supremum Tribunal nuper consuluit de recto exsecutionis tramite.

Re denuo altius considerata, hoc Supremum Tribunal decretum exsecutivum in Congressu die 20 novembris 2009 habito tulit.

Cum autem et hoc decretum exsecutivum in cassum cesserit ob comperendinationes ex parte Archiconfraternitatis, immo monitionibus spretis de libertate iurisdictionis ecclesiasticae per recursus ad auctoritates civiles non impedienda, hoc Supremum Tribunal die 21 decembris 2009 Cl.mum Decanum Archiconfraternitatis in diem 29 decembris citavit ut claves aedificii in quo exsecutio peragenda est, in depositum apud hanc Signaturam Apostolicam traderet.

Quibus praehabitis,

SUPREMUM SIGNATURAE APOSTOLICAE TRIBUNAL

Re sedulo examini subiecta;

Considerato quod Cl.mus Decanus Archiconfraternitatis epistula diei 24 decembris 2009:

- comparere recusavit saltem ante diem 15 ianuarii 2010, inanibus excusationibus allatis;

- claves tradere pariter recusavit, apposis captiosis condicionibus minime ad executionem *de qua* pertinentibus;

Denuo pro monitis habitis partibus earumque procuratoribus ac repraesentantibus necnon omnibus quibus hoc decretum notificatum est, ne ad huius decreti, necnon decreti diei 20 novembris 2009 heic ad omnes iuris effectus adiecti, executionem ac proinde iurisdictionis ecclesiasticae libertatem impediendam, ad Auctoritates vel Magistratus civiles quomodocumque recurrere praesumant (cf. can. 1375), salvo utcumque iure ad damnorum forte illatorum reparationem ob dilatam executionem (cf. can. 128; art. 92, §2 *Legis propriae* H.S.T.);

Vi praescriptorum, quantum ad rem pertinent, cann. 1611, 2º ; 1651 et 1655, §2 necnon art. 121 Const. Apost. *Pastor bonus* atque, saltem ex analogia, art. 94 *Legis propriae* H.S.T.,

decrevit:

Rev.mum D.num B, Dioecesis N. Vicecancellarium, constituendum esse et facto constitui usque ad diem 31 decembris 2010 Commissarium Archiconfraternitatis Z, cuius Cl.mus Decanus generalis suspendendus est et suspenditur a munere Decani, immo a quocumque munere in Archiconfraternitate *de qua* forte detento, usque ad diem 31 decembris 2010;

Cl.mum Archiconfraternitatis Decanum generalem iterum monendum esse et facto moneri ne huius decreti necnon decreti executivi diei 20 novembris 2009 executionem quomodocumque impediendam praesumat.

Ita pronuntiamus ac statuimus, mandantes iis quorum interest, ut H.S.T. definitivam sententiam atque hoc decretum executioni tradant, ad omnes iuris effectus.

Em.mus Ordinarius huius decreti executionem per se vel per idoneam personam curabit. Quodsi executio ulteriores moras patiatur, res ad H.S.T. statim deferenda est.

Datum Romae, e Sede Supremi Signaturae Apostolicae Tribunalis, die 8 ianuarii 2010.

SUPREMUM SIGNATURAE APOSTOLICAE TRIBUNAL

Raimundus Leo BURKE, *Praefectus*

+ Franciscus DANEELS, o.praem., *Secretarius*